


Noticia
Transparente
di Gobierno

ISLA ONLINE

Diahuebs 7 Maart 2024

Email: IslaOnline@gobierno.aw Tel: 528-4952

ARTE DI MURAYA
SAN NICOLAS



**STABILIDAD
Y
PROSPERIDAD**
2 0 2 4



Gabinete Wever-Croes



Den conexion cu e reunionnan riba e debe di Covid

REUNION CU PREMIER MARK RUTTE TABATA UNO POSITIVO

Dialuna atardi Prome Minister Evelyn Wever-Croes a reuni cu Premier Mark Rutte riba topiconan relevante pa Aruba. Un di e puntonan importante durante e reunion tabata e refinanciamiento di e debe di Covid y e interes halto cu Hulanda a impone riba pais Aruba. Durante su bishita na Hulanda, ya Prome Minister a reuni caba riba e topico aki cu Secretario di Estado Alexandra van Huffelen, y cu señor Marnix van Rij di Ministerio di Finanzas. Ambos, Prome Minister a remarca, di ta dispuesto pa yuda caminda cu por.

Prome Minister a informa Premier Rutte di tur e negociacionnan cu ta andando. Un reunion sumamente importante mirando cu ta Consejo di Minister di Reino mester aproba cualkier palabracion cu wordo haci. Durante e reunion tawata tin hopi interes cerca tur esnan presenta pa scucha di Aruba y su progreso.

"E realidad ta cu Aruba ta bayendo bon, desempleo ta bahando, turismo ta bayendo bon y finanzas tambe ta na orden. Lo unico cu falta, ta purba na yega na un miho palabracion pa cu e interes halto cu Aruba a haya di Hulanda riba e debe di Covid. Pa cu esey, mi tin tur confiansa cu nos lo bay yega na un solucion cu ta na miho interes di pais Aruba", Prome Minister a expresa. ■■■■





Ministerio di Cultura y Comision Celebracion Dianan Nacional ta organisa **COMPETENCIA ESCOLAR DI FOTOGRAFIA Y BAILE:** **"ARUBA, ORGUYO DI NOS TUR"**



Manera ta un tradicion tur aña pa e celebracion di nos dianan nacional, Ministerio di Cultura ta organisa actividadnan colectivo pa scolnan por participa y gana premio. Ademas ta distribui material ilustrativo, y educativo riba e historia y realisacion di nos Himno y Bandera pa scol preparatorio y basico.

Pa e aña aki Ministerio di Cultura y CCDN ta organisa competencia escolar di fotografia y di baile. Un invitacion ta bay na scolnan preparatorio y basico pa participa den e competencianan aki y asina demonstra talento y creatividad di e alumnonan y cu e oportunidad pa gana premio pa nan klas.

COMPETENCIA ESCOLAR DI FOTOGRAFIA:

Pa participa e alumno mester saca un potret di loke ta laga nan sinti orguyoso di Aruba y hunto cu e potret ta manda un texto cortico, splicando dicon e potret ta laga e alumno sinti orguyoso. Tur mucha por saca potret, e potret mester wordo saca horizontal y na final e scol lo escohe e miho potret pa entrega na Comision Celebracion Dianan Nacional via email CCDN@cultura.aw. Potret por wordo saca cu celular of camara y e potret mester wordo entrega prome cu 14 maart pa 12'or di merdia. Tur scol preparatorio y basico por participa, lo anuncia un ganador pa scol preparatorio y un ganador pa scol basico. E premio lo ta 350 florin na 'kadobon' pa e klas ganador.

COMPETENCIA ESCOLAR DI BAILE:

Tambe e aña aki lo organisa pa scolnan basico, un Competencia Escolar di Baile. Tur klas di scol basico por manda nan video di baile creativo uzando e audio di e jingle "Aruba, orguyo di nos tur". E video mester wordo graba horizontal y e video mester wordo manda via email prome cu 14 maart pa 12'or di merdia na CCDN@cultura.aw. E competencia tin dos categoria, uno di 1-3 klas y di dos categoria di 4-6 klas. E ganador di 4-6 lo mester presenta e baile di e jingle dia 17 maart riba plaza Libertador Betico Croes durante e manifestacion cultural. E premio pa e ganador lo ta 750 florin na 'kadobon' pa e klasnan ganador.

COLECCION ARUBA

Pa mas informacion di Aruba su Himno y Bandera por bishita e sitio www.coleccion.com. Esaki ta un portal cu e herencia documental y audiovisual di Aruba, na unda tur estudiante y Aruba en general lo por haya cantidad di informacion di nos Pais Aruba y como tambe di nos Celebracion di Dia di Himno y Bandera. Ministerio di Cultura y Comision Celebracion di Dianan Nacional ta haci un cordial invitacion na tur scol, docente y alumno pa haci bon uso di e portal di informacion aki. ■■■

Himno y Bandera

Aruba, Orguyo di nos tur

Competencia Escolar

Competencia di fotografia

- Saca un potret di loke ta laga bo sinti orguyoso di Aruba hunto cu e potret un texto cortico dicon e potret ta laga bo sinti orguyoso.
- Potret mester wordo saca "Horizontal".
- Tur mucha por saca potret y na final cada klas lo scoge e miho pa manda Comision Celebracion Dianan Nacional via e-mail ccdn@cultura.aw
- Tur scol preparatorio y basico por participa. Lo anuncia un ganado pa scol preparatorio y basico.
- Ultimo dia pa entrega potret ta 14 di maart 2024 pa 12'or di merdia.
- Potret por wordo saca cu celular of camara.

PREMIO

AWG. 350.00

na "giftbon" na un luga di preferencia pa e klas Ganado.



Fotografia: Edrick Krozendijk

Competencia di baile

- Tur klas di scol basico por manda nan video di baile creativo uzando e audio di e jingle "Aruba, orguyo di nos tur".
- E video mester wordo graba "Horizontal".
- Categoria Klas 1 te cu 3 y Klas 4 te cu 6: lo anuncia un ganado pa cada categoria.
- Video mester wordo manda via e-mail ccdn@cultura.aw
- Ultimo dia pa entrega e video di baile ta 14 di maart 2024.

PREMIO

AWG. 750.00

na "giftbon" na un luga di preferencia pa e klas Ganado.

Jingle: Aruba, Orguyo di nos tur



Pa informacion di Aruba su Himno y Bandera bishita

www.coleccion.aw



Minister di Finansa y Cultura



Comision Celebracion Dianan Nacional



UNOCA



Departamento di Cultura Aruba



SETAR ELMAR



WATER- EN ENERGIEBEDRIJF ARUBA N.V.



Aruba Tourism Authority



UTILITIES ARUBA



ARUBA AIRPORT AUTHORITY



HEALTHY LIFESTYLE CENTER A YEGA PA E COMUNIDAD PARIBA



Diahuebs mainta Minister Dangui Oduber a bishita MFA Savaneta hunto cu miembronan di Healthy Lifestyle Center pa wak e espacionan di e oficina cu tin disponibel. Esaki ta pa e uso di HLC brinda su servicjonan na e comunidad pariba di brug y asina aumenta e accesibilidad.

Healthy Lifestyle Center a inicia oficialmente dia 23 di februari 2023. E meta principal di HLC ta pa brinda e pueblo di Aruba e guia profesional pa cu nan nutricion y movecion, especialmente esnan na riesgo pa haya complicacion di salud, door di hiba un bida no saludabel. E meta ta pa guia e participante pa adapta su bida pa uno mas saludabel.

Den un aña HLC a logra di tin 300 cliente cu nan ayuda y guia pa hiba un bida mas saludabel. Pa e aña aki e meta ta pa yega 600 cliente.

Minister Dangui Oduber ta contento di anuncia cu e comunidad pariba di brug tambe lo haya su mesun centro. Pronto lo anuncia ki dia e oficina lo habri su portanan y tambe e orarionan.

Keda pendiente. Hunto nos lo bai logra tin un comunidad mas saludabel.

Minister Dangui Oduber

DIGITALISANDO SECTOR DI CUIDO

Algun luna pasa Minister Dangui Oduber a anuncia cu lo bai digitalisa sector di cuida haciendo uso di e plataforma Aruba Health App. Awe ministerio di salud hunto cu AZV a haya presentacion di profesionalnan di Setar NV ariba e avancen di e proyecto.

Pronto e asegurado lo sinti cambianan positivo ariba su Health App personal cu lo beneficia e asegurado. E team di SETAR ta trahando ariba un systema concreto di cita cu e asegurado su dokter di cas. E asegurado lo por via su app, tin e opcion di contesta algun pregunta y asina dependiendo di e urgencia lo ricibi un contesta con pa sigui padilanti y si ta necesario lo ricibi opcion pa reserva su cita na e dia y e horario disponibel.

Adicional SETAR ta inventarisando con por medio di digitalisacion nan por yuda otro instancinan den sector di cuida manera specialistanan y Sticthing Bob.

Conforme Minister Dangui Oduber su vision y conhuntamente cu Setar y AZV ta trahando pa logra introduci e beneficio aki pa aseguradonan, paso e pashent ta central. Funcion cu ta trahando ariba dje pa futuro ta entre otro: traha afspraak cu dokter of especialista, historia medico di e asegurado, busca receta y hopi otro function mas lo bay ta disponibel.

Segun e mandatario esaki ta un “era nobo” pa asina digitalisa henter e sector di cuida medico, cu un resultado pa sigui mehora tur e servicionan y e calidad di cuida pa tur dokter di cas por traha na un manera mas eficiente, transparente y mas rapido y asina tambe e asegurado por ta mas informa y sinti nan mes den control di nan salud y calidad di bida.

Minister Dangui Oduber ta gradici Setar NV y ademas partners pa e update ariba e progreso di e Aruba Health App.





MINISTER

Geoffrey Wever

GEOFFREY WEVER A DIALOGA CU 6E KLASSERS DI COLEGIO BON BINI TOCANTE SUSTAINABLE DEVELOPMENT GOALS

Minister di Asuntonan Economico, Comunicacion y Desaroyo Sostenibel, Geoffrey Wever, tabata di bishita na Colegio Bon Bini na Madiki, pa duna un presentacion tocante e Metanan di Desaroyo Sostenibel ("Sustainable Development Goals SDG's"). E SDG's ta enfoca riba con mundialmente por caba cu pobreza y hamber, elimina desigualdad, proteha nos planeta, y segura cu tur hende por disfruta di bon salud y cuida medico, husticia, y prosperidad comparti. Ta crucial cu ningun persona ta ser laga atras.

Pakico e ta importante pa educa nos



hobennan tocante SDG's? E metanan di desaroyo sostenibel ta un esfuerzo conhunto di tur persona y entidad den comunidad. "Nos muchanan tin un rol importante den transforma nos mundo - y isla - di mañan", segun e mandatario caminda a ilustra riba diferente ehempel con cada un di nos, incluyendo hobennan, por haci un diferencia.



"Hobennan tin e oportunidad pa haci un diferencia pa nan mes, nan famia y pa nan comunidad, p'esei ta importante pa educanan riba puntonan di desaroyo sostenibel. E interaccion cu e hobennan ta demostra cu nos nan ta hopi al caso di kico ta pasando na mundo, y ta representa un speransa pa mehoracion y mas inclusion den desaroyo di nos isla", minister Wever ta termina.



DELEGACION DI CURAÇAO Y SURINAM DI BISHITA NA ARUBA CU E MISIÓN CONTACTPLAN

A intercambia idea riba e veld di enseñansa y deporte



Recientemente, Minister di Enseñansa y Deporte Endy Croes a duna un presentacion den Parlamento di Aruba di acuerdo e mision Contactplan. Presidente di Parlamento di Curaçao Sra. Charetti America-Francisca hunto cu delegacion y Presidente di Parlamento di Surinam Sr. Marius Bee y delegacion tabata di bishita na Aruba pa intercambia idea riba veld di enseñansa y deporte cu e miembronan di Parlamento di Aruba. E meta di e reunion aki tabata pa evalua si den cierto area tin interes pa traha hunto, sea den e ramo di enseñansa of deporte.

Directora di Departamento di Enseñansa Aruba Sra. Anne-Marie Proveyer hunto cu Minister di Enseñansa Endy Croes a duna un

presentacion basta amplio di e maneho di enseñansa den su totalidad na Aruba. Durante e presentacion a papia tocante e Doorlichting van het Arubaanse Onderwijsbestel, PEN 2023 y SDG 4. Ademá di esaki, Minister Endy Croes a splica e delegacionnan di Curaçao y Surinam di e proyectonan cu tin riba nivel di 4 Landenoverleg, entre otro, PEL, Proyecto Kibrahacha, Samenopleiding di docenten y Strategic Education Alliance (SEA). Pa loke ta trata e proyectonan deportivo, Minister Endy Croes a repasa algun proyecto.

Durante e reunion a enfoca primordialmente riba Weganan Interinsular pa evalua si Surinam tin interes pa participa. Ademá di esaki, Surinam tambe tabatin interes pa Aruba participa den eventonan deportivo entre Surinam y Guyana. Finalmente, un bon reunion entre delegacion di Aruba, Surinam y Curaçao, unda a intercambia varios idea riba veld di enseñansa y deporte cu otro. ■■■



SAN NICOLAS AND ORANJESTAD

SHOWCASE YOUR PROPERTY

*Do you have real estate
for sale or rent?*

*Looking for investment to
develop your property*

Showcase your property at the
Aruba Investment Summit!

✉ info@investinaruba.com

Click Here 



Ministerio di Asuntonan Economico,
Comunicacion y Desaroyo Sostenibel

REGISTER NOW





Arte di Muraya na San Nicolas no ta simplemente
verf riba bloki. E creatividad, fantasia y color riba e
murayanan ta un fuente di inspiracion di artistanan
pa encurasha nos pa brasa e poder di creatividad y
colaboracion na nos barionan di Aruba.

2024

AÑA DI STABILIDAD Y PROSPERIDAD